

欽定剿平三省邪匪方略

欽定剿平三省邪匪方略正編卷二十七

丁巳年

正月二十二日

癸亥

福寧奏言伏查黃柏山地勢

寬廣周圍約有一百八十餘里四面峯巒壁立

山頂山腰澗水噴射下注滋邱河複嶺內並有

山溪賊人藉資取汲較之他處水道畧有不同

至賊匪糧食其渡河搶掠攜帶上山者原屬無

多惟因該處附近村庄居民先聞賊匪滋擾恐

被蹂躪多有挈帶家口負帶糧食避居其間且  
山頂地勢平行向有民人居住積聚亦多自賊  
人竄踞之後貲糧盡爲所有此時該匪等踞險  
負嵎糧食尙不空乏然以萬餘賊衆計其逐日  
所需亦復不少自臣統兵到此以來密設網羅  
並未容其下山搶掠勢必漸形匱乏賊匪等自  
知滅亡在即情急圖竄勢所必然臣密飭各路

嚴加堵截且於山僻小徑潛伏兵勇伺探賊人  
動靜正月初五日果有賊匪數十人從水草荒  
懸岸而下被伏兵奮力齊擊賊匪措手不及盡  
爲我兵殺斃生擒羅長信杜奉泰等七名嚴行  
審訊據供賊首林之華等見官兵四面圍攻卡  
隘屢被奪占欲思逃竄令我等下山探聽官兵  
稀少之處以圖衝卡等語當將該犯等正法梟

示因思賊卡四面高陡險仄驟難仰攻趁此圖  
竄之時可爲誘賊之計

臣

當卽分飭各路於偏

僻處所佯爲撤卡潛行撥兵埋伏以伺賊蹤初  
七日果有賊匪二三百人從天池口乘夜偷下

窺探河道候補叅將董寧川率同千把等帶領  
兵勇迎擊賊匪拚命抵拒力不能支我兵奮勇  
向前鎗箭齊發殲殺殆盡初八日又有賊匪三

四百人逕從大坡嶺而下試看路徑意欲乘間  
撲卡被關騰伏兵知覺該總兵率領將弁鼓勵  
兵勇爭先迎殺一面密派候補副將許文謨等  
掩襲賊人之後兩面夾攻死者不計其數餘匪  
倉惶潰散我兵乘勢追剿又斃死數十名賊匪  
爬山竄回踉蹌藏匿計此兩番剿殺之後賊勢  
益窮正可會合環攻相機進搗隨即知會成德

文圖並各鎮等訂期會剿適初九日大雪瀰漫  
數日不止現在雪勢甚濃冰凌交凝勢難攀陟  
又不得不稍遲進剿而凡有可通道路已會同  
成德等督率漢土弁兵並多募鄉勇四圍設卡  
晝夜巡邏不使賊匪一名飛越一俟天氣晴霽  
卽當設法進攻奏入

上命軍機大臣傳諭福寧勒保曰福寧奏官兵誘殺

黃柏山賊匪及嚴密兜圍各情形所辦俱屬得宜  
此時天氣想已晴霽勒保亦已到彼添此得勝生  
力官兵設法進攻諒此圍困賊匪自無難一鼓殲  
除佇盼捷音若勒保未到以前福寧已將林之華  
等擒獲卽係該督之功朕必另加懋賞也

二十四日<sub>乙丑</sub>宜綿奏言<sub>臣</sub>查太平一縣地處萬

山之中宵小本易藏聚自東鄉失守之後附近



太平之巴州通江亦有蠢動之信必須先將太平賊匪盡數廓清方可前進查有太平營候補遊擊謝開先在川年久曾與川北道李鉉帶領鄉勇撲滅鴿子山等處賊匪於地方較爲熟悉

臣卽率同李鉉謝開先親赴賊巢一帶躡探路

徑相度地勢查得通天觀高家寨南津關三處各聚賊三四千人山勢峻險相距各有二三丈

里不等形同犄角聲勢相聯通天觀地勢最高  
沿山設卡十八處皆用巨石壘砌壕深丈餘東  
面峭風梁西面官帽山尤爲險要官兵進剿必  
須由此二處攻入方能得手賊巢左右萬山叢  
雜在在與東鄉相通況太平爲大營後路本無  
城垣必須嚴密分布始可無虞至賊巢三處尤  
須同時並擊使其不能相顧然後可成破竹之

勢

臣

所帶兵丁已交鎮臣索費英阿帶領一千

名先赴達州應援其續調之洮州土司一千名

尙未到來此時自應儘現有之兵及竹谿鄉勇

趕緊剿辦隨於初六日先派叅將姜敏功等帶

兵由香子崖前進叅將皂常保等帶兵由鷺頂

頸前進謝開先等帶領鄉勇由石笋坪前進李

鉉等帶領鄉勇由接光坪前進全攻通天觀又

派遊擊永明等帶領兵勇從往還壩攻打高家  
寨遊擊哈三泰等帶領兵勇從母豬寨攻打南  
津關又派叅將雷仁等各帶兵勇分堵魯家壩  
黃泥嘴三登坡三處斷其竄入東鄉之路又派  
守備李殿元等各帶兵勇把守路通巴州通江  
之梁家壩及馬廠壩地方臣親率遊擊韓加業  
等守住白沙河總口爲諸路策應初七日早姜

敏功皂常保謝開先李鉉等四路會齊攻打通  
天觀迤西之官帽山大卡賊衆放鎗滾石兵勇  
間有損傷守備和倫奮不顧身首先衝突項受  
鎗傷陣亡其時兵勇憤怒一齊擁上鎗礮並發  
遂將官帽山頭卡奪獲殺賊三百餘人游擊韓  
以明等亦自黃泥嘴隘口乘機攻得哨風梁大  
卡韓以明及千總米章皆身受矛傷殺死賊匪

四百餘人會同姜敏功等乘勝將十八卡全行奪獲賊衆退守通天觀時已薄暮我兵卽在各卡紮住初九日黎明繞至通天觀後山梁俯臨賊巢用礮轟擊石牆俱已粉碎惟裏牆係大柵和草土築成礮不能入因密挑爬山兵勇三百餘人於是夜四更後謝開先帶領潛由卡面攀援而上近至柵邊拋入火彈賊人止圖抵禦後

面不虞火起十分慌亂兵勇乘勢攻開一擁而  
進刀砍矛刺殺死賊匪千餘生擒賊首謝克福  
等一百五十餘人餘匪分往高家寨南津關逃  
避謝開先等分路追趕時往遷壩母猪寨兩處  
員弁正在攻打兩寨賊匪不能入寨四散奔竄  
我兵分投追捕一面攻打愈急高家寨所屯火  
藥被礮轟燃南津關草堆亦有火彈拋入兩處

煙燄漫天燒死賊匪無數其竄出者俱經兵勇  
截殺十二三兩日沿途及各隘口又殺死八  
百餘人生擒二百餘人內龍通智訊係賊首據  
供係湖南衡山縣人五十七年來至太平縣種  
地有湖北人孫老五傳習邪教於去年十一月  
內糾合多人同到山上現在頭目五人孫老五  
爲首何如會爲副聞紫陽洞河口俱被剿洗官



兵指日就到孫老五帶親信唐德隆陳文等到  
東鄉頭目徐添德處請救何如會不知死生下  
落等語審明後卽與謝克福一併凌遲處死並  
同臨陣殺死之賊首黃白榮驗明首級梟示該  
處餘匪均卽正法謹繪通天觀南津關高家寨  
三處總圖恭呈

御覽所有賊匪寨柵房屋全行燒燬糧食什物賞給

出力鄉勇鎗矛軍械存貯備用共出力文武員  
弁及陣亡受傷兵勇俟查明咨部分別賞卹核  
辦現在太平境內業已肅清惟是地方遼濶周  
圍三千七百餘里山高林密路徑紛歧難保餘  
匪不無竄逸臣現在派令員弁鼓勵兵勇分路  
搜捕務期淨盡至東鄉之張家觀豐城場兩處  
賊匪臣細加偵探每處屯聚各有一萬餘人遠

近焚掠達州大路久已不通自東鄉失守賊勢  
愈張小路亦復梗塞臣營所需軍火糧餉皆由

陝西接運太平必須重兵彈壓東鄉巴州壤地  
相接隘口二十餘處均關緊要臣已飛飭續調

之兵兼程行走並飭川北道添練鄉勇將各處

後路布置無虞臣卽會同觀成英善兩面夾擊

以期早復東鄉縣治肅清逆匪再臣先經

奏調延綏兵五百名派遊擊李沆帶至川省聽調  
茲據各處稟報川省通江巴州亦有賊匪滋事  
陝省漢中府屬在在毗連現飛飭該遊擊等帶  
往漢中會同知府榮德原任知府鄧夢琴相地  
設卡分佈防守並令隨營辦事之漢興道文需  
趕回漢中調度一切至李鉉謝開先二員團練  
鄉勇堵禦隘口又叅將李文蔚遊擊韓以明節

次打仗奮勇受傷知府托銘辦理糧臺迅速妥  
協都司朱應魁毛伏千總米章馬隆周永福屢  
次打仗奮勇留壩同知齊默慎隨營辦事奮勉  
認真謹據實奏

聞

同日惠齡恒瑞景安慶成舒亮奏言臣等於初  
四五至十一二等日疊次分兵抄截賊匪分東

西北三面奔竄明係畏懼官兵恃其熟悉路徑

意圖牽制實屬狡詐臣等公同商酌臣恒瑞等

帶兵由西路臣慶成等帶兵由北路臣舒亮等

帶兵由東路一併迎擊臣惠齡率領協領穆克

登布等帶兵策應西北一路臣景安率領叅將

蔡鼎等策應東北一路並派道員先福等分帶

鄉勇於支歧小路擒捕潰匪臣等鼓勵各將弁

兵丁於十三日黎明同時並發臣恒瑞同碩雲

保六十七富成行至淡家岡地方正遇賊匪在

彼據住山岡吶喊搖旗臣恒瑞等將官兵分爲

兩翼一擁齊上賊見左右受敵勢實難支拚命

奪路下坡而逃自相踐踏滾落山溝跌斃者甚

多官兵乘勢追殺正遇臣惠齡帶兵迎截前來

賊匪首尾不能相顧臣車齡恒瑞等縱令馬步

各兵衝擊賊七八百人其時東路賊匪正在

禹山一帶奔竄臣舒亮及巴克坦布王文雄等

帶兵適至乘勢邀截先令馬兵衝入鎗箭齊發

繼以步兵短刃相接與賊攪殺一處轉戰十餘

里臣景安帶兵馳至策應官兵左旋右繞奮力

擊殺賊匪屍橫遍野餘衆四散狂奔臣慶成同

阿爾薩朗訥音德光等由北路瀧城一帶進攻



賊匪排隊抗拒我兵奮力直前並聞知東西兩路官兵已經得手將士勇氣百倍鎗箭所至賊匪應聲而斃餘衆捨命奔逃時已天晚陰雨昏黑暫行駐兵爲犄角之勢使賊不能遠遁

臣等

密相知會十四日仍分三路進攻東衝西擊賊人不能抗拒俱向南竄

臣

等帶領馬隊抄往南路迎頭截殺賊人紛紛折回又見後路官兵追

至進退無路拚死抗敵各路官兵奮勇衝擊殲  
賊六七百人餘俱竄至杏兒山一帶屯聚次日  
又值上元臣等料賊無準備遂令兵丁裹帶乾  
糧於五更進剿賊匪棄其婦女輜重相率而逃  
正在督兵分剿詎賊匪狡惡異常於沿路村莊  
暗伏多賊冀圖掩襲我兵之後經阿爾薩朗訥  
音富成德光等先行知覺將各該村層密圍住

賊匪據住村口抵死抗拒官兵用火箭火彈將  
村中賊踞房屋燒燃賊匪羣聚一處冒煙突出  
千餘人全被燒斃其餘各路敗竄之賊忽分忽  
合時避時迎臣等連夜沿途截剿其兵力不到  
之處潰竄賊匪均經先福完顏岱恒慶巴拜鄭  
成基等率領佐雜効力人員分路搜殺並擒獲  
活賊七百七十五名統計自十三至十六日各

路官兵殲斃賊匪實有四千餘人並有投崖落  
水乘隙自縊及臨陣自戕者臣等當將所擒活  
賊逐一究結據供賊人原想往西北一路逃竄  
數日來被官兵殺死過半現在祇有數千人乘  
空便逃並無一定去向至賊首姚之富張富國  
劉起榮等每逢抗拒官兵騎馬在後並不向前  
一見勢敗先自抽身逃竄等語餘無要供當卽

概行梟示除將搶獲牛馬糧食刀矛分賞留用  
一面查明傷亡兵丁另行造冊咨部外臣等現  
探潰匪俱向東南一帶逃竄惟有上緊抄截乘  
勝兜剿以期迅擒首逆此次各營將弁用命爭  
先謹擇其尤爲出力者另繕名單恭呈

御覽

同日惠齡奏言前奉

諭旨以黃瑞所供河面淺窄賊匪係臨時搭橋偷渡  
並曾將大嶺賊匪截殺之處恐係捏詞卸罪令

臣

秉公據實查奏

臣

於上年十一月初六日到營其

時正當奉

旨將黃瑞拏解進京

臣

詢問福寧始知拿獲賊匪供

稱於十月初六七日搭蓋浮橋十二三日賊人

從橋上過去竄至黃柏山而黃瑞供稱賊匪於

十二日紮筏偷渡等語

臣

俱在旁聽聞

臣

於茲

邱渡河之時該處並無浮橋痕迹所獲活賊業

經福寧卽時正法無可質訊其黃瑞所稱截殺

大嶺賊匪之處

臣

彼時未至該處實不能知但

黃瑞署任總兵帶兵駐守南岸不能隨時防範

無論賊匪搭蓋浮橋已非一日卽果如黃瑞所

供臨時紮筏不能卽行擊退致令賊匪偷渡疎

縱之咎亦無可辭再查早職甘肅肅州直隸州  
知州應先烈前經秦承恩奏請交與恒瑞等帶  
往軍營効力贖罪該員自上年五月來至軍營  
差委均無貽悞且帶領鄉勇堵截賊匪尤爲出  
力又候補縣丞蔣振萬前於灌灣腦軍營帶領  
鄉勇屢次隨同殺賊

賞戴藍翎嗣因該員諸事不能振作經臣奏明革職



留於軍營効力該員自革職以來頗知愧奮歷  
次截剿賊匪均隨同殺賊不避鋒鏑相應恭懇  
聖恩將應先烈蔣振萬均予開復原官用示獎勵

同日景安奏言

臣

前飭臬司陳文縉前往裕州

嚴密查拏劉之協茲據該司稟稱連日率同文  
武員弁遍歷各鄉詳細挨查並無鄧家河地名  
因於字音相似之鄧家店等處逐一查訪並無

張洪潮其人復提楊應邦覆加研訊據供該犯  
係襄陽縣周家灣人去年三月內拜廖士學爲  
師投入劉起榮夥內本年正月初一日劉起榮  
叫當探馬初二日被官兵拏獲送到大營審問  
向我追究劉之協下落我想從前曾聽見人說  
劉之協現在河南因隨口說在河南裕州鄧家  
河張洪潮家藏匿緣賊夥內有個張漢潮我故

編出張洪潮姓名其實並無其人亦無鄧家河  
地方上年十一月內不記日期劉起榮在草店  
被官兵打敗後都到方家集會議我聽見劉起  
榮說劉之協現在陝西鎮安縣東門外三官廟  
內做和尚叫趙貨郎先去送信令其投奔他處  
次日劉起榮等就向西逃走想是就往陝西去  
等語臣查劉之協爲傳教首逆必須迅速擒獲

楊應邦供詞狡混殊難憑信臣仍嚴飭臬司再

行密訪嚴拏但該犯既有劉之協現在陝西鎮

安縣藏匿之供臣已飛咨陝西撫臣查照嚴密

緝拏

同日成德奏言臣欽奉

上諭令將黃瑞所供稟請成德添撥兵丁一節據實

覆奏伏查臣於上年九月初一日帶兵行抵長陽

縣青岡坪聞滋邱賊匪連日在關口地方焚搶  
欲佔長陽之信

臣

成德文圖帶領官兵馳赴關

口一帶剿辦誠恐賊人渡河派委黃瑞帶兵一

百名在滋邱河南岸督率鄉勇堵截因

臣

等所

帶兵丁僅止一千數百名咨會惠齡續調兵六

百名此內復又派撥二百餘名併交黃瑞嚴加

防堵勿使賊人偷渡嗣據黃瑞稟請添兵

臣

以

賊匪佔踞地方遼濶兵力不敷分派西北一帶  
尙無堵截之兵况滋邱南岸官兵未到之前祇  
有鄉勇尙能嚴堵今已添兵三百餘名焉有不  
能堵禦之理顯係預留地步當經駁飭詎於十  
月十三日忽據黃瑞報稱賊匪數千分三路渡

河衝卡

臣

文圖卽刻帶兵連夜繞道前往堵截

臣

成德因地方緊要仍在關口防範至十五日

臣成德將迎龍山一帶賊匪剿殺餘匪山滋邱奔

竄文圖帶同黃瑞截殺是實臣成德仰荷

皇上天恩委以剿賊重任不能督飭嚴堵致被賊匪  
乘間潛逃毫無覺察又未將黃瑞貽悞情由據  
實叅奏實屬糊塗罪無可逭仰蒙

垂詢不敢不據實奏

聞均奏入

上命軍機大臣傳諭宜綿曰川省東鄉賊匪亟須剿捕正在盼望宜綿將太平縣附近之賊殲淨速赴東鄉會剿今據奏分兵四路將通天觀等處賊卡全行攻克殺賊二千六百餘名生擒三百餘名並殲擒賊首黃自榮等現在搜捕餘匪淨盡卽會同觀成英善夾擊東鄉賊匪所辦可嘉之至宜綿自督兵剿捕以來在陝省興安一帶屢次克捷茲甫



抵川境卽將太平縣通天觀等處賊匪全行剿淨  
事機極爲順利此實仰賴

上天垂佑欣慰之餘尤深欽感宜綿督率調度能合機  
宜著賞給大小荷包金盒一個分路帶兵之道員  
李鎡叅將姜敏功皂常保遊擊謝開先著賞給大  
小荷包其餘打仗出力文武員弁並著咨部議敘  
所有此次登山奪卡之兵賞給兩月錢糧其打仗

兵丁俱賞給一月錢糧至鄉勇等此次隨同打仗甚爲出力亦著宜綿查明酌賞並將鄉勇爲首出力者查明數人賞給頂戴使之倍加感奮守備和倫首先衝突殺賊捐軀甚爲可惜並著加一等議卹至太平賊首尙有孫老五一名現據宜綿奏稱該犯逃往東鄉該督等尤當嚴密查拏與不知下落之何如會一併擒獲免致復行勾結爲要

上又命軍機大臣傳諭惠齡景安泰承恩曰本日宜  
綿奏報太平縣通天觀等處賊匪全行剿淨惠齡  
復遞到捷音所辦一切可嘉現在賊勢已經潰散  
惠齡等倍加奮勉乘勢兜剿不使賊匪稍有暇隙  
至賊首姚之富張富國劉起榮等每逢抗拒官兵  
騎馬在後一見勢敗卽先行逃竄深爲可恨尤當  
設法布置務將賊首等按名擒獲又景安奏據楊

應邦供稱聽得劉起榮說劉之協現在陝西鎮安縣東門外三官廟爲僧等語劉之協係邪教首犯今旣據楊應邦供明該犯蹤跡且現係爲僧尤易辨識亟須嚴拏務獲秦承恩此時正在搜剿光頭山餘匪自無暇分身前往伊接到景安咨會後會否派委大員查拏藩司倭什布現駐省城尙無要務卽著該司親赴鎮安縣嚴密查拏務將劉之協

剋期擒獲男什聞信遠颺至楊應邦一犯本係賊  
夥因供出劉之協是以將該犯暫緩刑誅今前供  
河南裕州一節已屬虛捏若陝西鎮安地方又杳  
無蹤跡則是信口混供應卽解京治罪

上諭內閣曰宜綿奏太平縣賊匪滋事川北道李鈺  
等團練鄉勇堵禦隘口並辦理糧運等事俱甚出  
力道員李鈺候補遊擊謝開先叅將李文蔚遊擊

永明韓以明知府托銘俱著賞戴花翎都司張應魁毛伏同知齊默慎千總米章馬隆周永福俱著賞戴藍翎以示鼓勵

上又諭內閣曰惠齡等督率官兵分路擊賊設伏兜圍四日之內殺賊四千餘人各營將弁爭先用命據將出力人員開單具奏三等待衛色克通阿著賞給緡僧額巴圖魯名號台斐英阿著賞給斐禮

巴圖魯名號保邦著賞給瑚松額巴圖魯名號仍  
照例各賞銀一百兩協領吉善遊擊六十五泰安  
那爾泰都司劉管城俱著賞戴花翎都司李英多  
張攀桂俱著賞換花翎防禦西林泰驍騎校祿成  
守備曹玖馬滿海沈慶春千總丁殿元黃富國沈  
得榮把總張奇外委李如緒胡攀桂前鋒連布俱  
著賞戴藍翎三等侍衛額爾金泰伊里布俱著陞

爲二等侍衛委署叅領常泰前鋒校三保護軍校  
烏朗阿額爾成額守備劉應世把總薛國相俱著  
以應陞之缺卽用以示鼓勵其原任知州應先烈  
候補縣丞蔣振萬隨同剿賊均屬奮勉並著加恩  
准其開復原官俟軍務告竣應先烈仍發回甘肅  
以直隸州知州補用蔣振萬留於湖北以縣丞補  
用



二十八日已福寧勒保奏言臣勒保於正月十

四日行抵黃柏山軍營與臣福寧會晤當將官

兵節次進攻賊匪抵死抗拒及現在四處嚴密

設卡圍堵各情形詳細述知臣勒保卽帶同臬

司常明副將施縉等酌帶官兵親赴各路查勘

茲山四面寬廣約有二百餘里道路叢歧賊卡

林立憑高恃險拒守甚嚴其北面峭壁懸崖下

臨清江河沿岸一帶業經臣福寧安設營卡布

置周密東面長嶺一帶有關鴉等西面天池口

一帶有關鴉等東南黃金嶂一帶有成德文圖

等西南城口子一帶有關鴉等各路營卡官

兵防守實屬認真至南面四方臺尤爲賊巢緊

要門戶高險甚於他處並有小薄道嶺等處山

梁爲其外衛賊匪明知官兵必從此路而入又

見成德文圖屢次攻擊已至西流溪是以處處  
築立石卡木柵創有深壕捨命拒守並查看小  
薄道嶺等處亦甚險要必須設法先行攻佔方  
可直破中堅惟連旬雪霧瀰漫山高路陡仰攻  
難以施力臣勒保帶兵行至黃金嶂時賊匪見  
有官兵呼衆聚集由楊家寨直撲前來自應趁  
此生力軍威直前迎擊當與成德文圖會合分

投剽殺我兵鎗箭齊發當斃賊匪百餘人賊匪  
不能抵抗敗回楊家寨卡內死守我兵乘勝追  
至賊卡見有石牆木柵濠內遍插竹簽賊見官  
兵近卡卽堆放滾木擗石我兵奮勇直上跳進  
石牆砍開木柵擁入賊卡擊殺賊匪二三百人  
生擒執旗賊匪周之文等二十三名割獲首級  
八十三顆奪獲賊械一百餘件當將楊家寨賊

卡佔踞除將受傷陣亡兵勇查明咨部卹賞外

臣勒保仍一路週圍察看於十八日回抵柳金

橋軍營與臣福寧將生擒賊匪逐一嚴訊究出

周之文楊世璉二犯係林之華覃加耀親信大

頭目執旗率賊打仗據供黃柏山賊匪尙有一

萬六七千人糧食尙多溪水可資汲飲等語餘

無要供當卽交遲梟示臣等伏查賊匪困守黃

柏山現經官兵四面圍裹勢漸窮蹙恐其情急  
圖竄臣等現於四面要隘增添營卡嚴密圍堵  
截其下山竄逸之路惟因雨雪未止未能即時  
進逼賊巢一俟天色稍晴卽當上次相機剿辦  
奏入

上命軍機大臣傳諭惠齡福寧勒保曰黃柏山賊匪  
據險困守屢經官兵剿殺勢已窮蹙今勒保到彼

後因察看路徑遇見賊匪卽督兵迎擊斃賊多名  
所辦尙好昨因黔省狎苗聚衆滋事降旨令勒保  
馳赴南籠督辦此次福寧等奏報之摺係正月十  
九日所發距今已及一旬諒早將該處賊匪剿竣  
擒獲逆首林之華覃加耀等勒保自卽馳赴黔省  
設黃柏山賊匪剿捕尙需時日勒保亦不須在彼  
協剿卽將原帶兵將留與福寧輕騎從馳抵南

籠剿辦

二十九日

庚午

觀成英善勒禮善奏言查張家觀

匪衆與豐城之賊闖入東鄉縣焚掠後卽在縣

治及曾家山張家觀三處犄角屯聚又設立賊

卡數處以防官兵進攻

臣

等急欲督兵收復東

鄉縣治緣賊勢愈衆我兵究覺稍單正在設法

籌議初八日寅刻據天生橋營卡附近之貫子



山義首桂涵報稱賊匪因伊等屢次隨同官兵  
打仗欲來報仇懇請發兵救援等語

臣

等查該

處鄉民隨同官兵剿賊出力況匪衆旣已出巢  
自應乘機剿洗遂密派都司達自祥千總傅廷  
剛等帶領兵勇三百名暗伏貫子山右守備馬  
廷相千總王陞帶領兵勇三百名暗伏貫子山  
左協領蘇勒芳阿叅將呂朝龍等督率兵勇五



堵禦嚴密不敢再來衝突是以商議派令伊等  
出巢欲將貫子山桂姓村莊焚掠報仇後率衆  
攻撲達州城池抄襲糧道等語查達州係屯聚  
糧餉總漕之區臣等雖已先派叅將增順都司  
安如峒帶領兵勇五百名前往防守但恐堵禦  
難周是以又派道員李憲宜酌帶兵勇三百名  
馳赴州城駐劄協同堵剿初九日戌刻宜綿派

委索賈英阿帶兵一千名亦由太平到州

臣等

面語籌商必須扼據要路堵截方可鎮定民心

遂派增順安如峒等帶領川兵三百名鄉勇二

百名赴東鄉至達州之要路羅江口拏卡又派

副將玉柱叅將瑪璽阿都司應元寬等帶領陝

兵五百名在高家壩山梁防守索賈英阿督率

將弁官兵五百名駐劄距州十里之鳳嶺關道

員李憲宜督同署知州劉佳琦等防護城池以  
期聲勢聯絡十一日竟有賊匪二千餘人分爲  
兩路直撲羅江口營卡經增順安如峒等督率  
弁兵鎗礮齊發斃賊四五十人王桂等聞鎗礮  
之聲帶兵趕到匪衆見有官兵接應慌亂奔走  
復又追殺數十人生擒三十四名內有王廷傑  
文元富二名訊係賊目當卽一二寸礮梟示我

兵間有陣亡受傷另行查明咨部詎該匪等復  
密遣人赴東鄉達州交界之巴州屬方山坪王  
家寨土壩營等處勾結已經具結改悔之邪教  
羅其清冉文傳等起事臣等接據該州稟報飛  
派都司羅定國知縣劉清署達州吏目余永寧  
武舉李賀陽分帶兵勇前往會同保寧府知府  
李杭巴州知州常發祥署通巴營守備馬國柱

督率鄉勇堵禦該匪等因方山坪邪匪已被我  
兵圍截不能會合復遣賊目率衆一千餘人前  
往接應並將自達州至太平大路阻塞實屬肆  
行無忌隨又派守備馬大綏把總江悅柏帶領  
兵勇五百名赴瓦窑壩一帶堵剿毋任竄併蔓  
延臣現飛催前調懋功松潘等營官兵計日內  
亦可到齊布置妥協直搗賊巢或先收復東鄉

縣治疏通太平道路上緊剿辦再查宜綿現在  
太平剿賊所有軍火糧餉向由達州轉運供支  
昨因東鄉路梗當經臣英善札商宜綿暫於陝  
省撥供接濟茲准知會業已咨明秦承恩就近  
辦理又東鄉縣印信已據該縣知縣張宇陽親  
信家人攜帶逃赴營王繳臣英善現在遴員  
接署查辦一切奏入



上命軍機大臣傳諭惠齡宜綿觀成英善曰此次觀成等雖派委將弁相機掩殺但所殲賊匪不過二十三名及四五十名爲數覺少現在索費英阿帶兵由太平前至達州會同剿辦達州城池糧道均可無虞惟據稱東鄉賊匪密行勾結巴州所屬之方山坪王家寨等處賊匪經觀成等派令都司羅克國等督率兵勇預爲堵截而賊匪復遣賊目一

千餘人前往接應將達州至太平大路阻塞等語  
前據宜綿等已將太平通天觀等處之賊匪全行  
剿淨前赴東鄉是該督乘得勝之勢帶兵至東鄉  
會合正可將沿途賊匪順便剿殺肅清達州太平  
大路而興漢鎮艾如文又已到營朱射斗所帶撤  
回川兵二千名計日亦可趕到軍威壯盛想宜綿  
觀成等現已會商夾攻收復東鄉縣治索費英阿

李憲宜等如果始終奮勉並著咨部議敘至東鄉  
縣印信已據該縣家人攜帶赴營呈繳該縣家人  
係屬何人著查明附加獎賞徐添德既爲首惡又  
復狡詐著宜綿等於搜捕時留心擒獲若臨陣殲  
斃則已倘能生擒解京盡法處死尤足以快人心  
而抒衆憤

欽定剿平三省邪匪方略正編卷二十八 丁巳年

二月初二日

癸酉

宜綿奏言

臣

因太平地方遼闊

路徑紛歧前次剿洗通天觀等處賊匪後昏夜

之間難保無竄逸情事隨飭派將弁督率兵勇

分路搜捕茲據各該將弁稟報連日在溝洞及

老林內搜獲逸匪自一二人至十數人不等共

二百七十九人陸續解送審辦前來

臣

親提嚴

訊內有何如會一名係有名賊目據供於乾隆五十九年拜從湖北人孫老五爲師學習邪教孫老五糾衆起事令爲副頭目孫老五聽得陝兵將到趕赴東鄉請救令伊總管三寨初八九等日官兵攻破三寨乘夜偷走要投東鄉張家觀行至金竹山就被官兵拏獲又供孫老五與巴州通江賊匪都是一氣就是東鄉張家觀一

駁將來亦要歸併巴州通江搶了漢中再到西  
安等供當將該犯等分別凌遲處斬訖查巴州  
通江等處前據稟報亦有匪徒滋事經臣將續  
調來川之延綏兵五百名飛飭遊擊李沕帶赴  
漢中會同知府榮德多募鄉勇分佈防守並令  
隨營辦事之漢興道文需趕回督辦惟東鄉豐  
城場之賊近已歸併張家觀合爲一夥勢益鴟

張自搶佔東鄉縣治以後進據梁家崖窺伺太平縣又分二千餘人屯聚東鄉及巴州相通之周家河是何如會所供不爲無因漢中所屬南鄭褒城沔縣寧羌等州縣在在與川省接壤本營兵丁久經調派遠出通江巴州兵力旣單臣所帶弁兵亦難再爲抽撥萬一東鄉巴州之賊竄合一處撲滅又需時日莫若乘其未合亟據

要害使其隔絕不能相通以次攻剿似易得手  
查周家河距太平二百四十里爲東鄉至巴州  
要路亦爲太平至達州必由之路賊匪復屯聚  
於此旣欲斷我往來又可聯彼聲勢必先攻取  
周家河俾軍火糧餉得以通行無阻繼取梁家  
崖使太平無內顧之慮然後可分路進兵攻破  
張家觀賊巢爲收復東鄉之計現在明興帶領



固原兵五百名已至太平臣通盤籌畫除酌留

太平彈壓後路並分防路通巴州通江各隘口

外所餘官兵鄉勇臣與明興帶領剿辦周家河

及梁家崖之賊兩處旣平即可乘勢收復東鄉

而張家觀賊巢緊臨縣治止隔一河若先收復

東鄉又須分兵守禦不如先破張家觀建旵而

下查張家觀石崖三重四面皆係陡壁賊匪屯

聚二三萬人憑高據險且翻山而下處處可以

竄逸

臣

踣明可以進兵及防堵之路凡十餘處

札商觀成英善再行就近察看現儘所有之兵  
並續調竹谿鄉勇及雇募各處鄉勇均勻配搭  
將周家河梁家崖賊匪剿滅卽飛咨觀成英善  
等會合夾擊迅速收復東鄉縣治仰紓

宸厪至巴州通江之賊必須分投剿捕現在飛札秦

承恩柯藩侯剿竣光頭山賊匪後卽領得勝之  
師由漢中一路進兵奏入

上命軍機大臣傳諭宜綿觀成英善奏承恩柯藩曰  
宜綿奏連日搜捕太平餘孽並籌辦東鄉賊匪事  
宜所辦俱有條理現在明興所帶固原兵五百名  
已抵太平而英善前調之屯土兵丁自己全抵該  
處宜綿自督兵剿捕以來屢次克捷極爲順利惟

當倍加奮勉將周家河梁家崖賊匪速行搜剿淨盡卽會同觀成英善等併力夾擊攻破張家觀賊巢收復東鄉以期一舉蕩平至巴州通江之賊宜綿此時未能兼顧急需陝省分兵協剿秦承恩等在光頭山剿賊爲日已久該處賊匪祇係潰散餘黨無難卽時撲淨秦承恩等務須上緊辦竣以便柯藩卽日帶兵速赴巴州通江一帶搜剿賊匪毋

再遲緩陝省興安漢中等處地方緊要秦承恩應  
在彼駐劄彈壓不必遠赴川省以資鎮撫此次宜  
綿拏獲之賊目何如會業經訊明正法此後如再  
獲緊要賊目可備訊問者卽著派員解京其逆首  
徐添德糾衆焚掠尤爲可惡著宜綿觀成等務須  
設法擒獲解京盡法處治

初四日<sub>乙亥</sub>惠齡恒瑞慶成舒亮奏言<sub>臣</sub>等於前

月十四等日將賊匪痛加殲剿賊復分向東南  
逃竄四散分潰若逐一追捕不惟徒費兵力且  
恐賊匪狡獪轉得抄襲後路自應探明趨向分  
兵逼剿使其復聚一處以傾四面兜擒連日探  
得賊匪一股逃向洪山一股逃向宋河一股逃  
向勝廠等處沿途並未焚掠僅覓騾馬口糧日  
夜狂奔因公同商定臣恒瑞慶成同阿爾薩朗

碩雲保訥音六十七督率巴圖魯侍衛馬兵繞

向東南迎剿勝廠一帶賊匪

臣

惠齡督率總兵

德齡等帶領官兵直捕宋河賊匪

臣

舒亮同巴

克坦布率領將弁官兵進剿洪山賊匪

臣

惠齡

派委總兵德光帶兵接應舒亮並截賊匪西竄

之路總兵富成帶兵接應恒瑞等並截賊匪東

竄之路總兵明泰帶兵駐紮安居一帶以截賊

匪北竄之路又令道員先福等帶領兵勇各路  
埋伏以伺擒拏潰匪十八日同時並發十九日  
未刻臣惠齡行至茅茨畝探知賊匪相離宋河  
僅十餘里因卽密委德齡帶領馬隊繞赴宋河  
並令穆克登布盛永將兵分布東南西南山坳  
之內臣惠齡帶兵連夜行走直前掩捕賊匪見  
官兵不多恃其黨與尙衆撲向前來我兵鎗箭



齊發傷斃百餘人賊卽潰竄一至宋河經德齡  
帶領兵勇截殺未敢前進果從東南西南兩路  
分逃又經穆克登布盛永等統兵截住四面圍  
剿殺死四五百人餘賊四散狂奔適向正東一  
帶逃竄二十日黎明見王西山上有賊千餘人  
飛奔而下知係舒亮等剿殺洪山之賊臣惠齡  
卽率官兵迎頭截殺臣舒亮等亦隨後趕到兩

而夾攻鎗打箭射追殺二十餘里賊匪復折向  
東南潰逃時黑虎嶺山梁有潰匪數百人聚集  
一處見黨與爲官兵追剿卽突出接應德光率  
領步兵尋蹤掩至三面圍裹殺死多人賊匪料  
難抵禦復行四散臣恒瑞慶成等繞至勝廠以  
南賊匪一見卽逃我兵衝入賊隊短兵相接攬  
殺一處砍死執旗賊目二人其餘均向北竄又

經富成等截殺賊匪乘夜逃竄我兵並未稍歇

跟蹤追往時臣等並德光富成等先後趕到先

福等所帶埋伏兵勇亦左右齊出六隊環攻伏

屍枕藉在後之賊卽棄輜重分路潛逃我兵仍

分爲兩路悉力窮追賊匪忽聚忽散自二十二

至二十五日三路兜截殺賊不下三千餘人生

擒王得明等二百餘人現在賊匪雖向一處奔

竄而往來不定分合無常官兵連夜剿殺未免  
稍勞且糧運經行隨處趕送亦未能源源接濟

臣等一面差探賊蹤以便分路兜截一面令各

要隘處所派防兵勇嚴詰盤查連日拏獲潰散

匪徒一百八十餘人解送來營遂提同王得明

等逐一嚴訊據供賊目內有阮學明於二十日

被鎗打死尙有賊目韓敬中於二十三日中箭

身亡現在被脅之人陸續逃散僅餘強壯教匪五六千人聞得姚之富劉起榮張富國等商量總想逃入河南陝西境內另招同夥幫助因官兵四面截殺不能前往只想四路分逃並無一定去向當將各犯梟示計此次奪獲賊人鐵礮四座刀鎗矛斧等項八百四十餘件牛騾衣服無筭現在臣等繕具簡明告示射入賊中曉諭

迫脅入夥人犯果能誠心悔罪及早投出尙可免其一死日來投出脅從之犯甚多

臣等已遣

解襄陽交地方官逐一訊問看守俟事竣再行辦理再查二等侍衛祥金保因衝殺賊匪右頰受有刀傷已飭醫好爲調治並將受傷兵丁查明咨部奏入

上命軍機大臣傳諭惠齡福寧明亮額勒登保德楞

泰曰惠齡等帶領官兵分路截剿殲賊二千餘人  
生擒二百餘人現據獲犯供稱強壯賊匪尚有五  
六千人姚之富劉起榮張富國等想逃入河南陝  
西境內等語該處賊匪屢經官兵剿殺尙有五六  
千人必當速將首逆姚之富等生擒則餘匪自可  
解散此時西北一路經惠齡等分派弁兵截殺賊  
匪俱向東南逃竄不能闌入豫境但總須嚴密防

範不可稍存大意再前經降旨令額勒登保帶領  
湖北應撤各兵卽赴惠齡一路協剿嗣據奏行抵  
保靖因雪大暫駐花園此時想已晴霽如此旨到  
時苗疆諸事全竣額勒登保當速赴襄陽一帶協  
剿若額勒登保一時不能分身不妨先派鎮將帶  
領湖北之兵北旋正可迎頭截殺再明亮等駐劄  
乾州督拏滋事癩苗此時諒已辦竣所有善後事



宜有畢沅姜晟鄂輝三人足資料理明亮德楞泰  
帶領應撤之兵速赴東鄉達州自更得力至黃柏  
山賊匪久經圍困著傳諭福寧務宜相機設法擒  
獲林之華覃加耀殲淨餘匪卽帶得勝之兵迎赴  
襄陽一帶協同剿辦

初七日戊寅觀成英善奎舒勒禮善奏言查督臣

宜綿現在太平搜捕餘匪近因東鄉賊匪滋擾

道路梗塞必須先行設法疏通

臣

等前派守備

馬大綏把總江悅柏帶領兵勇五百名往瓦窑壩一帶堵截但兵勇爲數無多隨飛飭代辦東鄉縣事知縣劉清就地廣募鄉勇會同該守備等將沿途賊匪奮力剿逐茲據該令等稟稱連日會同分帶兵勇抄襲各路出沒賊匪已將周家河一帶道路疏通現在招集本地紳士率同

義勇設卡守禦自達州至太平可以無虞阻隔  
詎該匪等因周家河一帶有官兵防禦復於二  
十二日率匪衆二千餘人由查子峽翻山直撲  
磐市府隘卡該處係通達州要路先經派委達  
州營遊擊候補副將孫起龍督率把總胥耀宗  
帶同兵勇駐紮堵禦但鄉勇多而官兵少恐其  
不能抵禦適有續調之建昌營兵五百名行抵

達州卽飭令都司安如炯帶領由便捷小道馳  
往接應該將等策勵兵勇分投剿殺該匪始行  
退去斃賊十餘人生擒楊正潮蕭先惠二名解  
送來營隨又據委員縣丞呂朝恩盤獲奸細郭  
聯宗徐文舉周聰元三名一併委員嚴加訊問  
據該匪等供稱逆首徐添德等商議前次攻撲  
磐市府隘卡原要將此路打通卽可直撲達州

不料又添了官兵不能攻開大營官兵業經分往磐市府周家河各處料想營盤存兵無多不如乘虛攻取大營後再取達州新寧等語當將

該犯等一一寸磔梟示

臣

等隨公同商酌以該

匪等如此猖獗若不亟挫其鋒則該匪等必不能安守巢穴查東鄉失守以後兵勇大半分撥附近縣治各營實形單薄當據隨營道員百作

瑞稟稱大營召募長夫內可挑選精壯者一千  
餘人該道酌加獎勵給以刀矛器械令其幫助  
守營可將兵勇悉數派往殺賊等情臣等卽令  
該道預爲選備以資捍衛旋於二十四日辰刻  
據巡哨外委陳華報稱探得賊匪執旗五桿約  
計四五千入於本日卯刻出巢分路來撲營卡  
遂派鎮臣艾如文協領隆德副將富明阿都司

安如峒達自祥等各帶滿漢屯土兵丁義勇人等分投迎擊

臣

等復又挑備兵勇策應是日午

刻匪衆竟分三路直撲前來艾如文等督兵堵禦鎗礮弓箭齊發匪衆紛紛倒地而執旗賊首慙不畏死仍敢招呼醜類愈聚愈多相持不退土把總王保奮不顧身衝入賊隊將執旗賊目砍斃一名我兵遙見人人勇往直撲向前殲賊

數十人餘匪四散奔逃我兵正在追剿忽有賊

旗一桿約計千餘人由左面山梁直向

臣等營

盤政撲  
臣等派令守備李賓州判李師曾等帶

領兵勇三百名迎往抵禦又派守備馬廷相等

帶領兵勇三百名繞道截殺該匪等見有接應

料難抵敵遂亦敗回約計殲斃賊匪四五十名

生擒一十二名訊非要犯隨即一併正法奪獲



賊旗一面當卽銷燬刀矛鳥鎗等分給出力兵  
勇<sub>臣</sub>等現將進剿事宜趕緊佈置一俟得有宜  
綿自太平起程信息卽當訂期兩面夾攻收復  
東鄉縣治奏入

上命軍機大臣傳諭宜綿觀成英善曰觀成等奏此  
次賊匪因周家河道路經官兵疏通遂直撲磐市  
府隘卡復經兵勇擊退輒敢窺伺大營觀成帶兵

迎剿防範尙爲周密而殲賊甚少且該處兵力尙單宜綿可以不必蒞至周家河卽直赴東鄉與觀成等會合剿辦所有盤獲奸細之縣丞呂朝恩著卽以知縣用衝入賊隊之士把總王保卽賞千總銜出力鄉勇人夫優加獎賞以示鼓勵

初八日己卯惠齡恒瑞慶成舒亮奏言臣等於正

月十九至二十五等日分兵兜剿賊匪四散奔

逃並無一定去向節遣員弁前往探聽知賊現  
有兩股一從東北潛逃人數較少一向西南逃  
竄人數衆多均不敢從大路行走多由山僻小  
徑人蹤罕到之處翻山越嶺日夜狂奔察其情  
形自因西南一帶山勢重疊可以遠竄之故

臣

等查現在賊蹤過於散漫轉難兜擒如果遁入  
窮山正可聚而殲洗因公同商酌東北一路賊

數不過千餘且無旗幟諒係逃竄餘匪

臣

惠齡

卽派阿爾薩朗訥音總兵明泰帶領滿漢官兵

二千名分投剿捕復派候補知府鄭成基同知

周季堂叅將烏爾卿額等帶領鄉勇兜截擒拏

其西南一路賊匪較多想逆首等均在其內必

須分兵圍擊

臣

恒瑞同碩雲保帶領馬隊由東

南兜剿

臣

慶成同六十七帶領馬隊由東北截

殺臣惠齡舒亮同巴克坦布帶兵由正北進攻

又派總兵富成由正東總兵德光德齡由西北

兜擒西南一帶有襄江阻隔已飭總兵馬瑀侍

衛烏什哈達安陸府知府施奕學等沿江截擊

復令道員先福候補道府恒慶巴拜知州阿霖

知縣庾泰鈞分帶壯健鄉勇於各路歧出之區

密爲佈置二十八日分道並發臣恒瑞行過劉

家港地方探知有賊二千餘人翻山圖竄當卽傳問土人知附近有小路一條可以繞至賊後隨督率官兵抄至後山見賊匪紛紛趨下當令鎗兵排列連環直前擊打賊匪不意官兵掩至無心抵禦仍奔上山找尋舊路官兵一齊拾上從後追剿殺死一百餘人生擒劉文舉等七人訊據供稱姚之富等復招得同教二千餘人現

將各賊復分三股一向東北一向西北我們一路要往東南逃竄每股有二三千人適被官兵截殺想亦逃向西北去了姚之富劉起榮等都在此內等語當即向前迎殺賊匪不暇返顧尋路爭逃時富成已帶兵前來左右夾擊伏屍遍地臣惠齡等因聞東南一路鎗礮之聲料賊匪必向西北竄逸一面知會慶成等各帶馬兵尋

蹤抄襲一面趕赴前進正遇東南之賊敗竄奔

至隨即帶兵迎擊殺死四五百人賊匪爬山越

嶺四散潰逃

臣

慶成等卽帶兵於西路要隘密

行紮住詎賊匪狡惡異常其東南之賊意欲誘

令官兵盡向彼追以便西北之賊乘空逃逸適

遇

臣

慶成等帶兵在彼卽率夥直撲前來我兵

奮勇上前鎗箭齊發殺死多人又值六十七德



光德齡等各帶馬步官兵兩路殺至賊匪料難

抵敵復向東南奔逸又與臣惠齡等剿敗之賊

相遇合爲一夥恃其黨類復悉力迎拒我兵鼓

勇爭先遠者鎗打箭射近則刀砍矛戳賊匪毫

不退却相持一時之久臣舒亮等帶領馬兵接

應而至賊匪見官兵又復增添捨命奪路盡奔

向鮑家畝一帶藏匿時已二更陰雨交作該處

盡係水田小徑路復歧雜未便冒險直入隨將官兵仍分四路露宿紮住二十九日黎明雨勢少止

臣

等卽率官兵直前圍剿賊復肆行抗拒

官兵勇氣倍增時有頭纏白布手執大旗騎馬

賊目一人往來號召極爲兇悍可惡先經碩雲

保放箭中其左膀

臣

恒瑞復射中其左脇該犯

將箭拔去馳驟如舊

臣

慶成目擊情形憤恨切

齒馳馬趕上射中該犯腰間始行落馬旋有夥  
賊蜂擁來救臣慶成督率將領殺散夥匪親將

該犯生擒詰其姓名狡不供吐隨令前獲之賊  
認識均稱係劉起榮是實一面委員押送回營  
一面帶兵追剿賊匪見首逆就擒不敢再行抗  
拒四散狂奔我兵自後截殺又斃四五百人並  
經先福在各小路擒獲李孔昭等二百十三名

奪獲騾馬三百餘匹餘匪盡向西南一帶奔逃  
臣等復將劉起榮令李孔昭等逐一指認實係  
正身並於該犯身上搜出黃綾一塊上書該犯  
姓名並經文呪語其爲正犯無疑該犯係應解  
京之人身受箭傷三處頗爲深重未便用刑推  
鞫現飭上緊醫治一俟稍可支持卽迅速解京  
以申

國憲而快人心其李孔昭等於訊明後卽同劉文

舉等均行梟示

臣

等現各帶兵分路兜圍務期

趁此賊情窘蹙之時將首夥各逆按名全獲掃

蕩餘氛再劉起榮供稱現在搜獲之黃綾一塊

上書經呪係劉之協所給去年四月內該犯曾

囑棗陽之貨郎趙一化瓏前往河南找尋劉之協

下落因卡防甚嚴未能過去該犯嫌其無用業

已逐出不知去向等語是前此拏獲之楊應邦  
所供有趙貨郎往來通信一語並非無因且該  
犯供稱不知去向焉知非仍令趙化瓏前往尋  
覓劉之協不肯實供如將趙化瓏拏獲則劉之  
協蹤跡自可跟究臣惠齡已將訊出趙化瓏年  
貌密飭附近州縣嚴密偵緝一面咨明河南撫  
臣一體查拏務獲奏入

上命軍機大臣傳諭惠齡曰此次賊匪被官兵分路  
圍擊復分三股逃竄其東南西北兩股之賊因官  
兵追殺緊急合爲一夥悉力抗拒經惠齡等督率  
將弁鼓勇奮剿殲斃賊衆數百名生擒二百餘人  
並拏獲首逆劉起榮解京所辦甚好惠齡恒瑞慶  
成舒亮巴克坦布阿爾薩朗碩雲保訥音富成德  
齡德光馬瑀明泰著賞給金盒銀絲盒大小荷包

以示獎勵至慶成年少高興朕所深悉前經有旨  
令惠齡查奏遣令回京今劉起榮係慶成射中腰  
間始行落馬看來慶成近日自知改悔竟能奮勇  
出力著仍留軍營帶兵其前罪且不必深究現在  
賊匪經官兵分路圍剿並臨陣生擒首逆賊人自  
聞風膽落惠齡等惟當乘賊情窘蹙之際鼓勵兵  
弁上緊兜圍將首逆姚之富張富國悉行擒獲自



可尅日蕝功

上又命軍機大臣傳諭景安倭什布曰本日惠齡等奏生擒首逆劉起榮供稱現在搜獲之黃綾一塊上書經呪係劉之協所給去年四月內該犯曾囑棗陽之貨郎趙化瓏前往河南找尋劉之協下落並閱該逆供單內稱上年二月間因地方官查拏邪教甚嚴起意拒捕有河南五六千人前來入夥

等語前因景安奏派臬司陳文緯赴裕州查拏劉之協並無其人復訊之獲犯楊應邦有劉之協在陝西鎮安縣東門外三官廟爲僧之供當卽諭令倭什布親赴該處嚴拏迄今未據覆奏今劉起榮又有上年四月曾囑趙化瓏往河南找尋劉之協之供是該犯非竄往陝西卽仍在豫省潛匿必須上緊拏獲方可淨絕根株其趙化瓏一犯係往來

通信之人已經惠齡等開明年貌知照豫省亦應  
嚴拏務獲著景安倭什布設法嚴密查拏無任漏  
網至豫省向多傳習邪教現在劉起榮卽有河南  
五六千人入夥之供此時剿捕未竣自不便紛紛  
查究又滋事端但景安現駐邊境總當密爲防範  
勿令湖北賊黨竄入勾結

初十日辛巳景安奏言查浙川內鄉一帶山徑叢

雜路通楚陝甚關緊要先經臣派令將弁帶兵

五百名在李官橋等處扼要把守賊匪北竄卽

經臣會同惠齡等連夜兜截未便深入屢獲竄

匪訊有賊衆商謀欲由浙川一帶竄赴陝西之

供當卽飛飭該地方官並專委道員完顏岱知

府彭如幹前往慎密察訪旋據內鄉縣知縣胡

峒稟稱拏獲形跡可疑之丁自有訊出習教傳

徒與浙川教匪糾約竊發情節並據完顏岱率同巡檢蔣輝宸將頭目繆名高盤獲並獲夥犯楊振江等五十九名稟報前來

臣

因案關重大

必須親往剿辦當將東北一切防堵事宜妥爲

布置

臣

卽率領叅將廣福蔡鼎帶領馬步兵八

百名星夜由內鄉馳赴浙川將各犯親提嚴訊

據供王佐臣卽王老師傅楊賈氏係屬教首繆

名高丁自有與糾尙綱楊志才楊廣仁文明山  
等均係頭目輾轉傳徒私製白旗刀矛號衣搭  
包等物爲記正月初旬與湖北賊匪暗相通信  
糾約夥黨俟姚之富等竄至浙川一齊豎旗接  
應旋聞官兵將賊殺敗未及起事欲俟李官橋  
官兵撤回之後另圖乘機竊發等情伏思賊匪  
屢被官兵痛剿該犯等尙敢陰謀糾衆冀圖助

惡尤爲罪不容誅若一一拘拏未免有需時日  
恐致聞風漏網必須乘其未發先行撲滅當卽  
密傳該縣紳士人等親加詢問該紳士等亦已  
聞知道跡義切同仇隨向詢明教匪居住村莊  
臣卽督率廣福蔡鼎完顏番彭如幹及文武員  
弁分帶官兵令紳勇前導齊赴南北鎮東西黃  
大溝泉等處村莊出其不意分投擒剿該匪等

倉猝之間竟敢各持器械公然拒捕經兵勇立  
時殲斃約有一千餘名教首王佐臣楊賈氏並  
頭目楊志才劉尙綱楊廣仁文明山等均經生  
擒並拏獲夥匪何士萬等八十六犯臣親加嚴  
訊各據供認習教糾約接應楚逆等情不諱當  
將首夥一百五十餘犯一併綁赴市曹凌遲梟  
示搜出白旗號衣等件悉行銷燬仰賴



皇上洪福該犯等於逆迹未發之先早爲敗露立予  
駢誅俾良善輯寧民心鎮定實深欣幸惟是浙  
川內鄉兩縣地方遼濶恐有餘匪未淨

臣現仍

督率文武分投查緝一面出示曉諭三兩日內

趕辦事竣酌留官兵彈壓

臣卽馳回東路邊境

一帶會同王文雄堵截竄匪

同日宜綿明興奏言東鄉賊匪屯聚張家觀盤

踞縣治復於中前後三河險要處所多設賊卡  
又令黨夥分據周家河梁家崖接引巴州通江  
賊匪爲窺伺太平之計若不扼其要害倘經竄  
合蔓延必致道路梗塞臣將所帶官兵鄉勇通  
盤籌畫除留守太平分防後路外派叅將李文  
蔚遊擊韓以明等帶兵勇各五百名駐守白沙  
河以防東鄉賊人由前河竄入太平之路又派

遊擊圖與阿李逢春帶兵勇各五百名由中河  
前進剿辦梁家崖賊匪派叅將雷仁遊擊王相  
龍哈三泰等帶兵一千名遊擊謝開先守備余  
德高知縣王駿猷帶鄉勇二千名由後河前進  
適新授重慶鎮總兵百祥趕到卽令其統領前  
項兵勇直取周家河臣等帶領所餘兵勇繼進  
先與觀成英莖約定俟到周家河時再商夾擊

旋於途次接據圖興阿稟報二十七日行抵安  
家河探知梁家崖賊匪因官兵將到退至清溪  
場金莪寺兩處屯聚與張家觀相距二十里餘  
爲犄角之勢又據保寧府知府李杭稟稱巴州  
方山坪賊首羅其清嘯聚六七千人甚爲鴟張  
近日通江賊首冉文儔又與其黨夥三四千人  
竄至方山坪迤東六十里之王家寨屯聚相爲

首尾意在併力抗拒乘間竄入張家觀合夥該處鄉勇力不能堵望兵甚急並准觀成英善札稱周家河賊匪現已撥兵剿散道路疏通等情

臣查王家寨距後河大路不過八九十里若

臣

等進攻張家觀則方山坪及王家寨賊匪勢必潛出劫襲轉致前後受敵不如先將巴州賊匪殲除然後進攻張家觀較爲穩妥當令百祥督

同雷仁等馳赴王家寨方山坪剿辦

臣

等暫在

周家河紮營就近策應俾巴州之賊無由竄赴  
東鄉並嚴防張家觀及清溪場金莪寺數處賊  
匪前來接應一俟後路廓清計續調甘洮各兵  
亦可到齊卽行前進剿洗清溪場金莪寺兩處  
賊匪與觀成英善夾擊張家觀之賊以期一鼓  
蕩平

同日秦承恩柯藩奏言臣等剿辦紫陽五作雲

賊匪事竣卽籌辦安康光頭山事宜因該處萬

山叢雜歧路甚多所帶官兵不敷分撥當卽札

調竹谿鄉勇一千五百名並飛飭本境鄉保及

四川界嶺居民各團聚鄉勇前來接應尅日到

齊臣等先馳抵該處細加廝探光頭山緊接四

川界嶺突起一峯峯頂微凹形若仰盂大可數

里左右兩面俱係巉巖峭壁前面亦係陡崖尙有路徑可上後面小路一條可通界嶺嶺上老林密箐綿亘百餘里人跡不通賊人於山頂豎立木城城內各挖地窖度板棲息又於窖上搭蓋板屋草棚隱藏深邃前後兩路各塹深壕一道四面堆放滾木插石木城空隙之處支架鎗礮備禦甚嚴山之對面爲朝陽坪有卡三處通



界嶺後路有下二處亦俱扼要

臣

等公同籌酌

賊寨憑高據險我兵從下仰攻難以得手必須

由朝陽坪界嶺兩路前後夾擊使賊匪首尾不

能相顧方可設法進攻當卽分派兵勇堵截各

隘口以防賊人竄逸於正月十一日挑派官兵

分前後兩路進發

臣

等隨後繼進十二日卯刻

先令遊擊阿元東阿等帶領兵勇由朝陽坪山

右向上攻撲密令署叅將鍾岳都司白印斗等帶領兵勇潛伏朝陽坪山左暗襲賊後迨右路兵勇進至卡前賊人果全數向右抵禦鍾岳等卽乘勢由左路一齊撲上賊匪兩面受敵登時潰亂我兵奮勇剿殺刀砍矛扎殲斃五百餘人奪獲賊人頭卡其二三卡賊匪爲數無多我兵乘勝攻撲同時奪獲<sub>臣</sub>等相度地勢朝陽坪正

對光頭山賊寨兩山相距約四五里中隔山溝  
我兵下至溝底向上攻撲賊於崖上俯視親切  
卽滾放木石擊打稍近則於木城內施放過山  
鳥我兵難以立脚隨令官兵在朝陽坪上暫行  
剗住派遊擊蕭福祿趕運大礮迎面轟擊因相  
隔稍遠不能得力隨看得光頭山左右有小山  
包二處高與賊寨相埒若由山後覓路而上佔

此二山用礮轟擊方能得勢

臣

柯藩隨帶領土

人晒明路徑親往布置因十四日以後大雪五日積深數尺路陡冰滑礮身重大難以運往至十八日天色稍霽卽派署同知葉文麟等趕緊開修路徑運礮至山令都司巴燕孟光李有貴等帶領兵勇守護礮位各對賊寨轟擊木城間被摧倒賊匪於礮過後卽時用木植豎起且恃

有地窖藏身相持兩日維時派往界嶺一路之  
遊擊王福都司韋洪知縣莊振胡國棠等帶領  
兵勇亦於十二日覓路繞至賊寨之後因路徑  
陡險異常有平利縣捐職州同周希元首先攀  
藤附葛直上山頂踴明路徑竹谿縣千總職銜  
蕭登元臨潼縣候選從九品顧麟趾自帶健壯  
鄉勇先行開路兵勇得以魚貫而進撲近賊卡

鎗箭齊發賊匪不料官兵猝至登時潰亂被官兵殲戮多人遂將頭卡奪獲未盡之賊奔歸二卡併力圍守我兵連次攻撲間有損傷又自十四日以後連日大雪難以進逼至二十日始攻破二卡卡內之賊爲壕所阻不能歸入大寨滿山奔竄被我兵盡數殲斃寨內之賊見二卡已破俱上木城悉力拒守並排列過山鳥施放我

兵不能逼近據邊

臣

等復派鍾岳州同程鵬縣

丞趙廷麟等帶領兵勇運送礮位趕往界嶺於

賊寨後轟打二十二三等日賊匪四面被礮圍

擊殲斃甚多十分慌亂二十四日遂俱躲入窖

內不敢至木城邊窺探

臣

等見賊匪畏懼潛匿

勢已不支隨於二十五日傳令各路將弁仍用

大礮連擊一面密令前後兩路將弁趁礮聲不

絕之時鼓勵兵勇各帶短刀必帶攀援而上潛  
伏半山俟礮聲一止卽同時擁上搶奪大寨是  
日午刻玉福韋洪莊振胡國棠等先由後路砍  
伐林木架壕而進拋擲火彈將寨內草房板屋  
燒著烟焰衝起前路官兵亦卽同時越壕撲進  
併力掀倒木城兩面夾擊賊匪拚死抗拒我兵  
人人憤怒刀砍鎗扎殺死賊匪男婦及被火燒



斃者共二千餘人又破寨時有賊徒數十擁護  
賊婦一人身穿道服舞劍作法被兵勇亂矛扎  
死訊係王劉氏妄稱無生老母係賊總頭目割  
取首級梟示首犯劉文照彭儀萬石金順劉大  
富萬洪禮等各受重傷當卽凌遲處死生擒男  
婦二百餘人審明分別辦理現在安康境內賊  
匪業已淨盡無遺惟查光頭山緊接四川界嶺

恐有零星餘匪竄入老林越至川境臣等派撥

弁兵分投搜捕並飛咨宜綿知照川省守卡兵  
勇嚴密截剿不使一名漏網均奏入

上命軍機大臣傳諭惠齡宜綿景安秦承恩曰浙川  
教匪與湖北賊匪暗相勾結欲俟姚之富等北竄  
豎旗接應旋聞官兵將賊匪殺敗復另圖乘機竊  
發景安乘其未起先行搜剿淨盡想湖北賊匪聞

風其勢益就窮感昨據惠齡奏已將首逆劉起榮  
擒獲賊分三股逃竄自必紛紛潰散易於搜捕惠  
齡等務須上緊擒拏首逆迅速集事至豫省地方  
向多傳習邪教此時自未便紛紛查究致啟驚疑  
景安惟當密爲留心如有似浙川之陰圖勾結情  
迹破露者自當照此迅速捕滅若未露端倪者不  
可令州縣過事搜剔以安民心此時姚之富等不

日卽可拏獲此等反側之徒亦可消弭於無事矣  
適又據宜綿等奏東鄉賊匪踞隘距守牽掣官兵  
今擬先將巴州賊匪剿除再進攻張家觀以期收  
復東鄉雖未進兵攻剿而一切調度俱合機宜現  
據秦承恩等奏光頭山賊匪全行剿滅陝省安康  
等處竄匪業已搜捕淨盡柯藩自卽遵照節降諭  
旨迅赴川省幫同會剿現在宜綿續調甘省兵丁

諒已早到聲威較壯宜綿觀成英善柯藩等務須  
奮勇進剿會合夾擊速蒞大功

上諭內閣曰此次浙川內鄉教匪夥黨景安能留心  
查察於逆迹未發之先預行擒剿立就駢誅使湖  
北賊匪不能糾結滋擾厥功甚偉景安著賞戴雙  
眼花翎加封伯爵並賞寶石帶頭大小荷包以獎  
勲勞此次在事出力文武員弁俱著咨部從優議

敘其有分外出力可嘉者另摺奏聞兵丁等並著  
查明各賞一月錢糧鄉勇等亦查明賞資以示鼓  
勵

上又諭內閣曰秦承恩等奏光頭山賊匪全行剿滅  
陝境肅清所辦實屬可嘉秦承恩柯藩著賞給金  
盒荷包等件仍交部從優議敘此次打仗出力員  
弁等均著查明咨部議敘兵丁賞給一月錢糧其

有分外出力者另摺奏聞候朕加恩以示鼓勵

十四日乙酉福寧勒保奏言黃柏山賊匪經官兵

連次剿殺奪獲卡隘各處山巖溪徑添設賊卡

抗拒愈堅臣等嚴飭各路分布兵勇四圍堵截

二月初一二日天色開霽臣等定期知會成德

文圖進剿後因成德文圖一路正當賊人緊要

門戶一經得手即可直搗中堅臣勒保當撥帶

來貴州兵一千名派令遊擊褚大榮都司閔懷

希等帶領

臣

福寧抽撥漢土官兵四百名交遊

擊斬文銓戴朝恩等帶領赴彼協剿並密飭各

路鎮將同時進發

臣

等在後策應鼓勵將士爭

先効命總兵諸神保一路帶領遊擊何天標都

司蘇榮煥等乘夜進攻並派守備譚公義分投

埋伏蘇榮煥等當卽攀巖越坎而上出其不意



先將賊人逼上坡頭卡焚燒殲殺正在搶佔之際賊人由鷺凸嶺奔來抄襲當有埋伏弁兵四起迎頭截殺賊人措手不及紛紛潰敗被官兵鎗擊刀砍而斃者不計其數惟時總兵慶溥帶領弁兵攻撲王家灣賊卡候補叅將董寧川守備孫應奉等從右而上守備周言昇宋吉典等從左而上賊人聚衆抗拒該將弁等兩路夾擊

殲殺賊匪數十人賊衆敗逃上山官兵隨後追  
殺當將賊人頭卡二卡立時燒燬總兵關騰一  
路率領將備兵勇由鹿耳坪曲溪前進攻奪英  
靈觀賊卡該處地勢陡險官兵奮勇仰攻賊匪  
於巖上堆放滾木擂石我兵直前撲殺擊斃賊  
匪數十人賊方棄卡避匿險峻處所其黃金嶂  
一路成德文圖派委遊擊靳文銓等率領漢土

官兵由西流溪進攻賊卡賊人早有准備見我兵甫至半坡鳴鑼吹號聚集多人抵死抗拒我兵踴躍爭先跳越濠溝向上仰攻山徑愈窄止容一人行走賊見我兵競上卽將滾木擣石推下內有奮勇漢土官兵三百餘名奮不顧身直搶至賊人卡牆之下因石卡高堅我兵爬上卡牆賊人拚命抵拒成德文圖於靳文銓等攻卡

之時乘勢在小薄道嶺山尾及左右山包並地  
骨坪一帶山梁拏卡六處甫經紮定賊人復敢  
前來撲搶均經我兵奮勇擊退此次各路進剿  
土把總生根投効布政司理問職銜李炯原任  
遂平縣典史左堯臣生員王永培八品職銜楊  
允升俱打仗陣亡其餘陣亡受傷兵勇等查明  
咨部卹賞查賊巢高險逆匪到處紮卡恃爲屏

障官兵必須逐層進逼體察形勢諸神保慶溥  
關騰三路均離賊巢稍遠且峯巒極峻進攻較  
難惟成德文圖一路距賊巢較近能將四方臺  
奪占卽可迅掃其巢今此次所繫六卡已逼近  
四方臺梯兒巖等處賊卡頗爲得勢自應趁此  
趕緊籌辦奏入

上命軍機大臣傳諭福寧勒保額勒登保曰此次福

寧等帶兵進剿分投埋伏先將賊人逼上坡頭卡  
焚燒截殺賊人措手不及被我兵砍斃甚多並將  
賊人頭二卡燒燬所辦可嘉此次打仗兵丁勞苦  
可憫著賞給一月錢糧其陣亡之士把總生根布  
政司理問李綱典史左堯臣生員王永培八品職  
銜楊允升俱著咨部加一等議卹以示軫惜現在  
官兵緊逼巢穴賊勢窮蹙感勒保已馳赴貴州南籠

福寧務須乘勝進攻卽將四方臺梯兒巖等處賊卡奪占拏獲首逆前有旨令額勒登保於苗疆事竣後酌量前赴湖北襄陽一路協剿昨據惠齡奏已將首犯劉起榮拏獲襄陽一路卽可捕剿完竣而黃柏山賊匪尙在恃隘困守此時額勒登保竟當帶領撤回之兵卽速赴黃柏山會同福寧剿辦同日秦承恩奏言查興安府所屬廳縣濱臨漢

江萬山叢雜界聯川楚表延千有餘里各省就  
食貧民挈眷前來依親傍友開墾山地所在多  
成村落五方雜處良莠不齊稽查匪易府城設  
立興漢鎮標控制山南爲省城屏障最關緊要  
上年春間楚匪蠢動奉調興漢鎮兵一千名赴  
楚協剿已經一載尙未歸伍是以興屬匪徒滋  
事不得不遠調甘肅兵丁以資剿捕今雖節次



剿洗完竣而民心甫定沃地空虛且鄰近川省  
達州等處防堵倍宜嚴密仰懇

皇上天恩將原調陝西興漢鎮兵一千名卽令候補

副將朱士鳳先行帶回歸伍俾得駕輕就熟防

守本汛以重地方再四川通江巴州亦有匪徒

滋事該處與漢中府屬之南鄭褒城等縣毗連

臣因漢中協兵節經調派遠出存汛僅一百餘

名必須添雇鄉勇幫同守禦查有留陝差遣之  
原任漢中府知府鄧夢琴在陝年久熟悉地方  
情形飭令會同現任知府榮德團聚鄉勇分赴  
接壤各要隘設卡防堵並調延榆綏道溫承惠  
馳赴漢郡督同妥辦一面咨商督臣宜綿飛調  
延綏營兵五百名駐守漢中以資彈壓茲宜綿  
進剿東鄉賊匪此項兵丁尙有應須調撥之處

而興鎮官兵回汎有需時日臣已密商山西撫  
臣蔣兆奎在於所屬營分預備精兵二千名并  
令一千名駐劄蒲州府設有亟需即可渡黃西  
行奏入

上命軍機大臣傳諭惠齡宜綿秦承恩柯藩蔣兆奎  
曰秦承恩奏請撤興漢鎮兵回汎又咨商宜綿飛  
調延綏兵五百名駐守漢中又密商蔣兆奎預備

二千名先令一千名駐劄蒲州前據宜綿奏巴州  
通江與漢中境壤毗連一切防剿事宜飛札秦承  
恩俟光頭山賊匪剿淨卽移駐漢中相機籌辦秦  
承恩此奏自係因漢中地方遼濶預爲籌備起見  
但黃柏山一路賊匪恃險死守現在勒保又往貴  
州湖南征苗勝兵到彼尙須時日是興漢之兵一  
時未能撤動柯藩昨剿淨光頭山賊匪自己帶兵

赴宜綿一路該處帶兵大員現有觀成英善奎舒  
勒禮善索費英阿朱射斗百祥明興足資分投領  
兵不在柯藩一人竟當令該提督率領原帶之兵  
迅回漢中幫同秦承恩料理一切更爲妥善其續  
調延綏兵五百名著宜綿酌量撥給至惠齡一路  
亦有檄調陝西之兵一經竣事酌令先回以備秦  
承恩調撥防守蔣兆奎接到秦承恩密札後祇須

密爲預備該省兵額無多前已調往預楚協剿本省營汛亦不宜空虛該撫務當鎮靜辦理

上又命軍機大臣傳諭宜綿口宜綿柯藩均在東鄉一帶剿賊而興漢鎮百祥亦在川帶兵現祇有秦承恩一人駐劄興漢鎮照料難周著宜綿不時留心探聽如此旨到時東鄉等處賊匪業經剿淨能與柯藩百祥回至漢興固屬甚善若畧須時日而

秦承恩因該省乏人不得把握朕意川省帶兵大  
員甚多應令柯藩帶領原去之兵速行回陝或令  
總兵百祥先行回駐興漢幫同防守其續調延綏  
兵五百名亦交秦承恩分撥防駐惟在該督就近  
酌籌妥辦俾兩處均無疎虞不致顧此失彼爲要